

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

**DARIPADA : DATO' HAJI MOHD FASIAH BIN HAJI MOHD
FAKEH [SABAK BERNAM]**

TARIKH : 7 OKTOBER 2021 (KHAMIS)

SOALAN

DATO' HAJI MOHD FASIAH BIN HAJI MOHD FAKEH minta **MENTERI KESIHATAN** menyatakan jenis-jenis varian COVID-19 yang terdapat di Malaysia dan nyatakan varian COVID-19 yang paling dominan di negara ini dan setakat manakah kejayaan Kerajaan khususnya Kementerian Kesihatan Malaysia (KKM) dalam membendung, mengawal dan merawat pandemik COVID-19 serta langkah dan pelan tindakan (*plan of action*) Kerajaan seterusnya bagi memerangi pandemik COVID-19 ini secara lebih efektif.

JAWAPAN

Tuan Yang di-Pertua,

1. Kementerian Kesihatan Malaysia (KKM) melalui Institut Penyelidikan Perubatan (IMR) dan Institut Kesihatan Negara (NIH) telah melakukan analisis turutan jujukan genom penuh virus SARS-CoV-2 (COVID-19) dari sampel klinikal. Sehingga 26 Ogos 2021, jumlah kumulatif kes yang dijangkiti oleh virus SARS-CoV-2 yang dikategorikan sebagai *variant of concern* (VOC) dan *variant of interest* (VOI) adalah sebanyak **956 kes**. Daripada jumlah yang dikesan tersebut, 936 kes adalah VOC manakala 20 kes adalah VOI. Terdapat sebanyak 713 kes varian Delta, 209 kes varian Beta dan 14 kes varian Alpha bagi kes VOC, manakala terdapat 13 kes varian Theta, empat (4) kes varian Kappa, dan tiga (3) kes varian Eta bagi kes VOI. Perkembangan ini adalah sejajar dengan situasi di negara lain di mana varian Delta adalah yang paling dominan serta mempunyai kadar kebolehhajjangan yang lebih tinggi.

2. Seterusnya, bagi membendung, mengawal dan merawat pandemik COVID-19 serta langkah dan pelan tindakan (*plan of action*) kerajaan bagi memerangi pandemik COVID-19 ini secara lebih efektif adalah dengan memperkukuh dan meningkatkan tindakan kesihatan awam iaitu:

(i) Analisis Penjujukan Genom

- Melakukan analisis turutan jujukan genom penuh virus SARS-CoV-2 (COVID-19) dengan memberi fokus kepada pemantauan terhadap semua jenis mutasi gen terutama pada anjakan protein yang memainkan peranan penting dalam proses pengecaman reseptor dan proses membran sel (*receptor recognition and cell membrane fusion process*).
- Meningkatkan kapasiti penjujukan genom, di mana satu konsortium yang melibatkan 3 Kementerian iaitu Kementerian Kesihatan, Kementerian Sains, Teknologi dan Inovasi serta

Kementerian Pengajian Tinggi (KKM-MOSTI-KPT) telah ditubuhkan. Konsortium ini yang melibatkan beberapa institusi dan universiti telah menerima peruntukan sebanyak RM3 juta untuk menjalankan penjujukan genom SARS-CoV-2 sebanyak 3,000 sampel dalam masa 3 bulan bermula Ogos 2021 supaya bilangan sampel yang dijalankan penjujukan genom melebihi 1% daripada semua kes positif. Sebagai perbandingan, kapasiti penjujukan genom di beberapa negara ASEAN adalah seperti berikut - Singapura (6.0%), Thailand (0.43%), Vietnam (0.31%), Indonesia (0.11%) dan Cambodia (0.82%). Antara kriteria yang digunakan untuk pemilihan sampel termasuk sampel yang mempunyai nilai kitaran ambang (*cycle threshold value*) kurang daripada 25, sampel daripada kluster positiviti tinggi, kes kematian/BID atau kes ICU.

(ii) Program Vaksinasi

- Vaksin COVID-19 adalah salah satu tindakan kesihatan awam yang berkesan bagi melandai kadar jangkitan COVID-19 pada masa sekarang. Walau bagaimanapun, individu lengkap dua dos bukanlah tidak akan dijangkiti langsung, namun 88% daripadanya tidak mempunyai simptom dan 96% tidak memerlukan kemasukan ke hospital. Oleh itu, langkah ini sekali gus akan dapat mengurangkan kapasiti hospital yang kini berada dalam keadaan genting berikutan jumlah kes yang tinggi terutama di Unit Rawatan Rapi (ICU).
- Strategi pemberian vaksin juga disegerakan khususnya di kawasan yang mempunyai jumlah kepadatan penduduk yang tinggi bagi membendung penularan virus selain dapat mengelak pembentukan varian baharu. Sehingga 25 Ogos 2021, sebanyak 13,842,928 orang atau 42.4 peratus penduduk di negara ini sudah menerima dua dos lengkap vaksin COVID-19 sejak Program Imunisasi COVID-19 Kebangsaan (PICK) dilancarkan bermula Februari lepas.

(iii) Pematuhan prosedur standard operasi (SOP)

- Penduduk Malaysia sentiasa diingatkan untuk mematuhi (SOP) walau di mana berada. Rakyat perlu memainkan peranan penting dalam mengurangkan jangkitan COVID-19 terhadap varian baharu yang bersifat mudah merebak. Oleh itu, KKM sentiasa menasihati orang ramai untuk mengelakkan perkumpulan beramai-ramai di mana penjarakan susah untuk diamalkan serta tidak memakai pelitup muka yang betul seperti disarankan.

(iv) Saringan

- Orang ramai yang bergejala juga disarankan untuk menjalani ujian swab samada secara sendiri atau di fasiliti kesihatan bagi membuat pengesanan awal supaya tindakan kawalan dan pencegahan dapat dilakukan segera bagi mengelak berlakunya kejadian wabak di kawasan tersebut.

Sekian, terima kasih.